



KOMUNIKADO PA PRENSA

Fecha
2 di febrüari 2017

Accountmanager di Komunikashon
Jhanirha Da Costa Gomez

Email
jhanirha.anita@gobiernu.cw

Kondishon di buelonan di Insel Air nr.2

Willemstad - Debí na e echo ku Konsulado General Merikano na Kòrsou a duna un prohibishon na su personal pa bula ku InselAir, Gobièrnu Ulandes a disidí awe 2 di febrüari 2017 pa no laga su trahadonan bula ku Insel Air.

Minister di Tráfiko Transporte i Planifikashon Urbano (VVRP), sra. Suzy Camelia –Römer a tene atrobe kontakto ku sekretario di estado di asuntunan di aviashon sra. Sharon Dijksma. Den kombersashon a musta Gobièrnu Ulandes riba e echo ku anteriormente nos a ofresé

Gobièrnu di Merka i gobièrnu Ulandes, pa motibu di transparensia, pa nan laga nan inspektornan di aviashon inspektá seguridat di avionnan di Inselair Kòrsou. Minister atrobe a musta riba e echo ku Gobièrnu di Kòrsou i Outoridat di Aviashon Sivil di Kòrsou (CCAA) no ta laga avion bula si no konsiderá nan sigur. E maneho di CCAA ta "Safety First". Pa Gobièrnu di Kòrsou bida di hende ta sagrado i no ta kos pa hasi wega ku ne.

Ademas ta bon menshoná ku banda di e echo ku a insentivá e inspekshon for di aña pasa ougùstùs dor di kontròl mas frekuente, CCAA a aserká 5 kompania eksperto di aviashon - 4 Merikano i 1 Kanades- pa duna un oferta pa hasi un kontrol profundo i independiente di Insel Air.

Minister a referí Gobièrnu Ulandes pa informashon tokante di e avionnan di "ground" pa Aruba, na Civil Aviation Authority di Aruba. Minister a musta tambe riba e echo ku e avionnan aki, ku Aruba ta inspektando, no ta bulando i por konsekuensia no por papia di un situashon di inseguridat. Ta responsabilidad di Aruba pa atendé ku e inspekshon aki. For di 30 di yanüari 2017 e rutanen ku e avionnan di Aruba tabata bula, ta keda ehekutá pa diferente kompania di charter aprobá pa CCAA.

Aviashon ta dinámiko i di e flete di 3 avion Fokker ku ta registrá na Kòrsou, Insel Air Kòrsou na e momentu aki a tene unu na tera pa un revishon. Mester bisa ku dia 4 febrüari próksimo un di e avionnan ta di skèdule pa un chekeo regular, i e di tres avion ta normal ta den servisio.

Gobièrnu di Kòrsou tin konfiansa den e pasonan ku a tuma huntu ku Insel Air pa restrukturá e kompania i salbuardiá e konektivitat di Kòrsou.